

– Յա՛, սիրելիս, նրա հետ պետք է այսպես լինել, – պատասխանեց Մարոն փոքր-ինչ հանգստանալով: – Ես չեմ ասում նա վատ տղայ է. նա վատ է միայն վատերի հետ, ով որ նրան հակառակ է: Բայց նրա քարե սիրտը յանկարծ փափկանում է, երբ մի խեղճ մարդ է տեսնում. քանի՛ անգամ ես տեսել եմ նրան, որ մտել է աղքատ գիւղացիների խրճիթը եւ նրանց փող է բախշել. նա իր բերանի պատառը ուրիշին է տալիս, երբ տեսնում է, որ նա քաղցած է:

– Բայց Ասլանը եւ Սագօն ինչպե՛ս են:

– Ասլանը լաւ տղայ է, բայց Սագօյին չեմ սիրում, նա լաւ տղայ չէ՛: Գիտե՛ս, Ֆարհատ, մի օր նա ի՛նչ ասաց ինձ. մեր բակումը նրա հետ մենակ կանգնած էինք. խօսում էինք մեր գիւղի աղջիկների վրայ. մէկ էլ տեսնեմ, այն աղոետը. – ախար նրա երեսը աղոետի նման է, – հա՛, Սագօն ձեռքը զցցեց իմ վզովը ու ասաց. «թո՛ղ Մարօ, պաչ անեմ քեզ»: Ես հետ քաշոեցայ, մի լաւ ապտակ՝ շըրըխկ նրա երեսին. քիչ էր մնացել խեղճի շիւ աչքերը քոռանային:

– Իսկ եթէ ես ասեմ ինձ մի պաչ տու՛ր, ի՛նձ էլ ապտակ կը տաս:

Նա սկսեց ծիծաղել եւ ոչինչ չպատասխանեց:

Ես գլուխս խոնարհեցրի նրա կուրծքի վրայ, երկար մեր շրթունքները չէին հեռանում միմեանցից: Մենք ոչինչ չուխտեցինք մէկ-մէկու հետ. մենք չխոստացանք միմեանց մշտական սեր, հաւատարմութիւն. – այսպիսի բացատրութիւններ չեղան մեր մէջ: Միայն սրտի խուլ լեզուն խոստացաւ շատ եւ շատ, այն, որ ամենասրբազանն է եւ աստուածային, այն, որ միայն սիրտը կարող է հասկանալ:

– Գնանք, – ձայն տոեց օրհորդը, որպէս թէ զարթնելով խորին հոգեղմայլութիւնից:

– Գիշերի ո՞ր ժամանակն է, – հարցրի ես:

Նա նայեց դէպի երկինքը եւ պատասխանեց.

– Տե՛ս, «բագումքը» երբ այն աստղի մօտ է հասնում, գիշերը կէս է լինում: Ուղիղ կեսգիշեր է: – Մենք վեր կացանք:

Մենք գնում էինք զանազան ոլոր-մոլոր ճանապարհներով. թէ ինչպե՛ս էի անցել ես այդ լաբիրինթոսը, ամենեւին չէի յիշում: Ի՛նչ կը լինէր իմ վախճանը, մտածում էի ես, եթէ Մարօն ինձ չգտներ. ես ոչ միայն գիշերով, այլ լոյս ցերեկով եւս չէի կարող գտնել Յասօի ազարակը:

Մարօն կպած էր իմ կողքին, եւ մանկահասակ աղջկայ դալար եւ թեթուն հասակի ամեն մի շարժումները էլեկտրապէս ազդում էր իմ վրայ: Բոլոր ժամանակը նա առանց լռելու խօսում էր, թռչելով մէկ մտքից դէպի միւսը.